

間多斃死

已卯 上幸成均館焚香文廟御明倫堂試儒生製述仍供饋

試官等書題以啓 上落點于箴題左議政尚震右議政尹漑

大提學鄭士龍啓曰今日親幸欲試人才而出箴雖善作者不

能展其手段也 上曰出箴可也命燭刻○禮曹判書洪暹啓

曰對馬島歲遣船還給事今日須相沈連源領府事不來而左右

相來議之何如 上曰如啓洪暹就左右相坐同議以啓曰當

答馬島曰爾等前年擒捕賊倭斬獲不多爾功不大故賞典微

矣爾等至今未滿其心故啓達于 殿下姑給五船然此後賊

倭犯境則當還奪之矣爾其更勉禁戢且中原所送之文不關

我國故不達於 殿下而還送云 上曰依啓為之○試官以

入格四篇入啓進士安社居首傳曰此儒生等居館者乎若外方儒生

則使不速歸可也○上還宮時入昌慶宮問安于 大王大妃

殿○上還宮○日暈白雲一道如氣自坤方至艮方竟天良久

乃減南方東方艮方如火氣